

**MALAYSIA**  
**DEWAN RAKYAT**  
**ATURAN URUSAN MESYUARAT**

**NASKHAH SAHIH/BAHASA MALAYSIA**

<http://www.parlimen.gov.my>

**HARI KHAMIS, 31 MAC 2011, PUKUL 10.00 PAGI**

**Bil. 16**

---

**PERTANYAAN-PERTANYAAN BAGI JAWAB LISAN**

1. PR-000-L42721  
**Dato' Lilah bin Yasin [ Jempol ]** minta **MENTERI PENGANGKUTAN** menyatakan :-
  - (a) berapakah jumlah kemalangan jalan raya yang berlaku sepanjang tahun 2010 dan berapakah yang melibatkan kematian; dan
  - (b) apakah program drastik Kementerian bagi mengatasi masalah ini.
2. PR-000-L42376  
**Dr. Mohd Hatta bin Md Ramli [ Kuala Krai ]** minta **MENTERI PENGAJIAN TINGGI** menyatakan sama ada Kerajaan bercadang untuk membina kampus cawangan mana-mana universiti awam ke Kuala Krai bagi menjadikan Kuala Krai pusat pembangunan ekonomi dan pendidikan yang baru di Kelantan Selatan.
3. PR-000-L42878  
**Datuk Bung Moktar Bin Radin [ Kinabatangan ]** minta **MENTERI KEMAJUAN LUAR BANDAR DAN WILAYAH** menyatakan :-
  - (a) cadangan pelaksanaan Projek Naik Taraf Jalan Kampung Sinar Jaya, Kinabatangan yang rosak teruk serta sukar untuk dilalui oleh masyarakat setempat dan peruntukan khusus bagi menyediakan pemasangan wayar dalam rumah (*internal wiring*) rumah-rumah penduduk miskin di daerah Kinabatangan; dan
  - (b) langkah Kerajaan dalam mengeluarkan masyarakat luar bandar daripada kepompong kemiskinan secara jangka panjang.

4. PR-000- L41410  
**Dato' Haji Ab. Halim Bin Ab. Rahman [ Pengkalan Chepa ]** minta **MENTERI PERTANIAN DAN INDUSTRI ASAS TANI** menyatakan secara terperinci kemajuan projek Pasar Borong Tunjong, Kota Bharu dan komponen sokongan yang diperlukan serta agensi/syarikat sokongan untuk kejayaan sepenuhnya pasar borong ini.
5. PR-000-L41380  
**Dato' Sri Ir. Mohd Zin bin Mohamed [ Sepang ]** minta **MENTERI PERUMAHAN DAN KERAJAAN TEMPATAN** menyatakan strategi Kementerian untuk meningkatkan keberkesanan tahap penguatkuasaan undang-undang di kalangan pihak berkuasa tempatan dan apakah kaedah peningkatan tersebut merangkumi penggunaan senjata memandangkan pada ketika ini terdapat pelbagai ancaman kepada keselamatan anggota penguatkuasaan.
6. PR-000-L42990  
**Puan Siti Zailah binti Mohd. Yusoff [ Rantau Panjang ]** minta **MENTERI KERJA RAYA** menyatakan apakah Kerajaan sedar keperluan membesarakan jalan di Pekan Rantau Panjang dan sekitarnya yang terlalu sempit dan sering berlaku kesesakan di cuti dan perayaan yang membahayakan penduduk setempat. Apakah penyelesaian jangka pendek dan jangka panjang.
7. PR-000-L41976  
**Dato' Noraini binti Ahmad [ Parit Sulong ]** minta **PERDANA MENTERI** menyatakan apakah tindakan yang diambil bagi menyelaraskan terma dan rujukan yang akan diguna pakai bagi membantu pasangan Islam yang berkahwin serta terlibat dalam kes penceraihan yang semakin berleluasa dewasa ini. Mengapa mesti sesuatu kes yg dibicarakan berlanjutan malahan memakan masa bertahun untuk diselesaikan.
8. PR-000-L41134  
**Tuan Mohsin Fadzli bin Haji Samsuri [ Bagan Serai ]** minta **MENTERI PENERANGAN, KOMUNIKASI DAN KEBUDAYAAN** menyatakan sama ada cadangan Kementerian untuk Suruhanjaya Komunikasi dan Multimedia Malaysia (MCMC) menapis iklan televisyen dan radio agar tidak bertindih dengan fungsi Lembaga Penapisan Filem (LPF) memandangkan sekarang ini LPF menapis kesemua iklan televisyen dan radio di samping filem dan rancangan televisyen lain.
9. PR-000-L42409  
**Datuk Ir Haji Idris Bin Haji Haron [ Tangga Batu ]** minta **MENTERI KEWANGAN** menyatakan bilakah skim rumah tanpa deposit boleh dilaksanakan kepada pembeli-pembeli rumah pertama seperti yang diumumkan oleh YAB Perdana Menteri selaku Menteri Kewangan di dalam pembentangan Bajet 2011 yang lalu.

10. PR-000-L42582  
**Tuan Kulasegaran A/L Murugeson [ Ipoh Barat ]** minta **MENTERI SUMBER MANUSIA** menyatakan :-
  - (a) mengapakah ramai masih menganggur dan sukar untuk mendapatkan pekerjaan apabila Malaysia mengisyiharkan negara guna tenaga penuh; dan
  - (b) adakah rancangan dilakarkan untuk membantu pengangguran. Jika tidak, mengapa tidak.
11. PR-000-L42738  
**Dato' Mohd Jidin bin Shafee [ Setiu ]** minta **MENTERI KESIHATAN** menyatakan status program pendermaan organ manusia di kalangan rakyat dan apakah reaksi yang diberikan serta apa pula program-program kesedaran yang telah dilaksanakan.
12. PR-000-L41595  
**Tuan Tan Kok Wai [ Cheras ]** minta **MENTERI WILAYAH PERSEKUTUAN DAN KESEJAHTERAAN BANDAR** menyatakan kedudukan kemiskinan dan kemiskinan tegar warga kota sepanjang 3 tahun kebelakangan dan program pembasmian yang telah dilaksanakan.
13. PR-000-L42841  
**Datuk Juslie Bin Ajirol [ Libaran ]** minta **MENTERI KEWANGAN** menyatakan apakah mekanisme penentuan harga minyak petrol RON97 diguna pakai berikutan pergerakan harga minyak global semakin meningkat, terutama berlaku krisis dalam Republik Mesir yang boleh menjelaskan operasi Terusan Suez sebagai jalan air perdagangan utama bagi komoditi minyak mentah.
14. PR-000-L41743  
**Dato' Haji Wan Abd Rahim bin Wan Abdullah [ Kota Bharu ]** minta **MENTERI PELANCONGAN** menyatakan adakah Kerajaan bercadang mempelawa Exco Pelancongan Kerajaan negeri-negeri turut sama dalam rombongan Kerajaan mempromosikan pelancongan di luar negara pada tahun ini.
15. PR-000-L41339  
**Dato' Haji Ismail Bin Haji Abd. Muttalib [ Maran ]** minta **MENTERI PELAJARAN** menyatakan berdasarkan kepada perkembangan semasa taraf pelajaran dan pendidikan di negara ini dilihat tidak seiring dengan persaingan perkembangan dan pembangunan ekonomi negara. Justeru itu, adakah Kerajaan menerusi Kementerian Pengajian Tinggi berhasrat untuk menghapuskan kelas-kelas Tingkatan 6 Bawah dan Atas serta menggantikannya dengan pusat pengajian bertaraf Kolej Universiti yang ditempatkan di setiap Parlimen atau daerah di negara ini.

16. PR-000-L42310  
**Tuan William Leong Jee Keen [ Selayang ]** minta **MENTERI KESIHATAN** menyatakan jumlah kes bunuh diri daripada tahun 2005 hingga sekarang dan apakah sebab-sebab kes bunuh diri berlaku serta langkah-langkah untuk mengatasi masalah tersebut.
17. PR-000-L42835  
**Dato' Haji Abd Rahman bin Dahlan [ Kota Belud ]** minta **MENTERI KERJA RAYA** menyatakan pencapaian dasar Kementerian untuk mengagihkan 10 peratus daripada nilai projek RM10 juta ke atas kepada kontraktor kelas F dan apakah Kementerian berhasrat menaikkan had projek kelas F kepada RM500,000.
18. PR-000-L42283  
**Tuan Chua Tian Chang [ Batu ]** minta **MENTERI KERJA RAYA** menyatakan jumlah bayaran pampasan tol mengikut syarikat bagi tahun 2009 dan 2010.
19. PR-000-L41162  
**Datuk Seri Panglima Abdul Ghapur Bin Haji Salleh [ Kalabakan ]** minta **MENTERI KEMAJUAN LUAR BANDAR DAN WILAYAH** menyatakan :-
  - (a) berapakah jumlah peruntukan dalam RMKe-10 yang dikhushuskan untuk program bantuan rumah bagi negeri Sabah/Sarawak; dan
  - (b) berapakah jumlah rumah yang akan dibina serta berapakah kos pembinaan yang akan ditanggung oleh Kerajaan.
20. PR-000-L42757  
**Puan Hajah Zuraida binti Kamaruddin [ Ampang ]** minta **MENTERI PEMBANGUNAN WANITA, KELUARGA DAN MASYARAKAT** menyatakan berapakah kes salah laku dan penderaan rumah tangga yang telah diselesaikan di bawah program perundangan dan advokasi Kementerian setakat ini mengikut pecahan jenis kes dan negeri.
21. PR-000-L41505  
**Puan Hajah Nancy binti Haji Shukri [ Batang Sadong ]** minta **MENTERI PELAJARAN** menyatakan apakah strategi Kementerian dalam mengatasi keperluan dari sekolah-sekolah di luar bandar.
22. PR-000-L42241  
**Tuan Gwo-Burne Loh [ Kelana Jaya ]** minta **MENTERI KEWANGAN** menyatakan secara terperinci mengenai:-
  - (a) pendapatan PNB tidak disalurkan kepada Bumiputera melalui ASN; dan
  - (b) mengapa dividen yang diisyiharkan sekarang sangat rendah sedangkan pada tahun 1981 dividen yang diberikan adalah sebanyak 25 peratus.

23. PR-000-L41154  
**Tan Sri Datuk Seri Dr. Fong Chan Onn [ Alor Gajah ]** minta **MENTERI PELAJARAN** menyatakan jumlah biasiswa yang telah dikeluarkan kepada pelajar-pelajar sejak tahun 2008 mengikut komposisi kaum.
24. PR-000-L41956  
**Tuan Sim Tong Him [ Kota Melaka ]** minta **MENTERI KEWANGAN** menyatakan :-
- syarat-syarat dan prosedur untuk mencetak wang kertas baru; dan
  - berapa jumlah wang kertas Ringgit Malaysia sedang diniagakan di pasaran tempatan dan antarabangsa.
25. PR-000-L42695  
**Datuk Dr Tekhee @ Tiki anak Lafe [ Mas Gading ]** minta **MENTERI SAINS, TEKNOLOGI DAN INOVASI** menyatakan dasar dan strategi bagi mempastikan negara sentiasa bersedia dan mampu berhadapan dengan ancaman Perang Siber (*cyberwar*) dan terorisme siber (*cyber terrorism*) yang mengancam seluruh dunia digital masa kini seperti yang melanda negara Tunisia, Yemen dan Egypt.
26. PR-000-L42093  
**Tuan Manickavasagam a/l Sundaram [ Kapar ]** minta **MENTERI PELANCONGAN** menyatakan purata jumlah perbelanjaan yang dibuat oleh setiap pelancong sepanjang tempoh lawatan di Malaysia untuk tahun 2010.
27. PR-000-L41619  
**Tan Sri Datuk Seri Panglima Joseph Pairin Kitingan [ Keningau ]** minta **MENTERI DALAM NEGERI** menyatakan hasil perbincangan LAB (Makmal) khususnya cadangan-cadangan berkaitan dengan pekerja asing dan pendatang asing tanpa izin di negeri Sabah dan adakah Kerajaan Persekutuan berniat untuk melaksanakan cadangan-cadangan tersebut.
28. PR-000-L42875  
**Tuan Mohd. Nasir bin Zakaria [ Padang Terap ]** minta **PERDANA MENTERI** menyatakan :-
- jumlah rizab tunai Petronas yang disimpan dalam USD, Euro, RM dan mata wang lain. Apakah usaha Kerajaan untuk memastikan nilai rizab tidak susut selaras dengan penyusutan nilai USD; dan
  - nyatakan, daripada segi peratusan dan nilai, berapa jumlah rizab tunai Petronas yang disimpan dalam negara, dan di luar negara, terutamanya di Amerika Syarikat dan Eropah.

29. PR-000-L41372  
**Dato' Seri Ong Ka Chuan [ Tanjung Malim ]** minta **MENTERI PERUSAHAAN PERLADANGAN DAN KOMODITI** menyatakan :-
- (a) jumlah keseluruhan keluasan ladang (dalam hektar) yang digunakan untuk penanaman getah berbanding dengan kelapa sawit di seluruh negara; dan
  - (b) sejauh manakah usaha penanaman semula getah dengan benih baru yang dapat menghasilkan susu getah yang tinggi telah dilaksanakan.
30. PR-000-L42240  
**Dr. Hiew King Cheu [ Kota Kinabalu ]** minta **MENTERI SUMBER ASLI DAN ALAM SEKITAR** menyatakan adakah rancangan-rancangan untuk membersih sungai-sungai dan permukaan sungai di Sabah dan apakah tindakan yang akan diambil untuk mengatasi banjir di Kota Kinabalu, Beaufort, Lahad Datu dan Tawau.
31. PR-000-L41359  
**Ir. Haji Hamim Bin Samuri [ Ledang ]** minta **MENTERI PELAJARAN** menyatakan adakah Kementerian akan mempamerkan 'ranking' sekolah-sekolah rendah dan menengah di negara ini selaras dengan pemilihan sekolah-sekolah bistari yang sedang diamalkan oleh Kementerian. Apakah pula kesan baik ke atas penyenaraian sekolah bistari terhadap keseluruhan mutu pendidikan di negara ini.
32. PR-000-L43017  
**Dr. Lo' Lo' binti Mohamad Ghazali [ Titiwangsa ]** minta **MENTERI WILAYAH PERSEKUTUAN DAN KESEJAHTERAAN BANDAR** menyatakan mengapakah sehingga kini Keramat Mall masih tidak beroperasi serta berapa lama lagi masa diperlukan untuk terus melayan keranah bakal-bakal penyewa dan persatuan peniaga yang terlibat dan berapakah kos penyelenggaraan bulanan sejak Keramat Mall siap sehingga kini.
33. PR-000-L41719  
**Datuk Haji Mohamed Bin Haji Aziz [ Sri Gading ]** minta **PERDANA MENTERI** menyatakan berapa ramai penuntut yang diberikan biasiswa melanjutkan pelajaran di peringkat Ijazah Kedoktoran di luar negara tetapi tidak balik bekerja dalam negara dan di negara mana yang menjadi tumpuan mereka bekerja.
34. PR-000-L42394  
**Dato' Dr. Haji Mohd Hayati Bin Othman [ Pendang ]** minta **MENTERI BELIA DAN SUKAN** menyatakan kejayaan belia negara dalam aspek kehidupan belia yang bukan hanya melibatkan kejayaan dalam bidang sukan sahaja, berserta statistik kejayaan tersebut.

35. PR-000-L41405  
**Tuan Masir Anak Kujat [ Sri Aman ]** minta **MENTERI KERJA RAYA** menyatakan sama ada Kementerian mempunyai rancangan dalam RMKe-10 untuk menaik taraf jalan "Pan Borneo Highway" di Sri Aman daripada 2 lorong berkembar kepada 4 lorong berkembar.
36. PR-000-L42734  
**Dr. Haji Dzulkefly bin Ahmad [ Kuala Selangor ]** minta **PERDANA MENTERI** menyatakan tentang kedudukan laporan dakwaan 'irregularity' dalam harga perolehan 38 unit Electric Multiple Unit (EMU)-6 koc untuk KTMB dari Zhuzho Electric Locomotive Corporation sebanyak RM 500 juta yang telah disiasat oleh SPRM.
37. PR-000-L42045  
**Dato' Seri Haji Azmi bin Khalid [ Padang Besar ]** minta **MENTERI DALAM NEGERI** menyatakan perkataan "racist" sering digunakan oleh sesetengah pihak di negara ini bagi melabelkan pihak yang lain sama ada mereka yang lantang mempertahankan Perkara 153 Perlembagaan Malaysia sebagai "racist".
38. PR-000-L42007  
**Dato' Seri Zahrain Mohamed Hashim [ Bayan Baru ]** minta **MENTERI PELANCONGAN** menyatakan apakah tindakan dan peraturan yang sudah dan akan dilaksanakan untuk menjamin keselamatan pelancong agar kejadian seperti kemalangan yang melibatkan jet ski di Pulau Pinang baru-baru ini tidak berulang.
39. PR-000-L41882  
**Tuan Ding Kuong Hiing [ Sarikei ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan usaha Kerajaan menaikkan kadar harga tong gas masak pada kadar sekarang sedangkan menghadapi masalah kekurangan bekalan tong tersebut. Jika tidak, nyatakan sebabnya.
40. PR-000-L41856  
**Dr. Lee Boon Chye [ Gopeng ]** minta **MENTERI DALAM NEGERI** menyatakan bilangan kemalangan dan kematian yang melibatkan bas ekspres setiap tahun mulai 2001 hingga 2010.
41. PR-000-L43004  
**Tuan Haji Ahmad Lai bin Bujang [ Sibuti ]** minta **MENTERI PELANCONGAN** menyatakan apakah bentuk rancangan pihak Kementerian untuk sektor pelancongan di kawasan Sibuti dan Miri memandangkan kedatangan pelancong asing seperti dari Eropah, Jepun, Korea, Amerika dan lain-lain kurang melawat kawasan khazanah dunia yang terdapat di kawasan Sibuti dan Miri seperti Gua Niah, Logan Bunut, Taman Negara Lambir, Mulu dan Coral Blue Sibuti.

42. PR-000-L42333  
**Tuan Amran bin Ab Ghani [ Tanah Merah ]** minta **MENTERI DALAM NEGERI** menyatakan mengapakah Kerajaan masih membenarkan akhbar Utusan Melayu terus menerus memainkan polemik kaum dan agama sebagai bahan berita yang boleh mengganggu gugat ketenteraman dan keharmonian masyarakat pelbagai kaum di negara kita.
43. PR-000-L42204  
**Datuk Wee Jeck Seng [ Tanjung Piai ]** minta **MENTERI PELAJARAN** menyatakan langkah-langkah yang akan diambil untuk menyelesaikan masalah kekurangan guru Bahasa Cina di Sekolah Menengah Kebangsaan.
44. PR-000-L42130  
**Tuan Gobind Singh Deo [ Puchong ]** minta **MENTERI DALAM NEGERI** menyatakan berapa ramai penduduk negara ini yang tidak bertaraf penduduk tetap sejak 5 tahun dahulu dan bilangan mereka dari segi kaum dan apakah langkah-langkah yang telah pun/akan diambil untuk mengatasi masalah ini.
45. PR-000-L42669  
**Dato' Dr. Mohamad Shahrum bin Osman [ Lipis ]** minta **MENTERI DALAM NEGERI** menyatakan sejauh manakah pengisian modul latihan Jabatan Pertahanan Awam Malaysia (JPAM) dan Ikatan Relawan Rakyat Malaysia (RELA) boleh menarik lebih ramai generasi muda untuk menyertai dua agensi itu.
46. PR-000-L42628  
**Tuan Haji Ahmad bin Kasim [ Kuala Kedah ]** minta **MENTERI PERUMAHAN DAN KERAJAAN TEMPATAN** menyatakan mengenai status Majlis Bandaraya Alor Setar (MBAS) adakah telah mencapai ciri-ciri sebuah bandar raya sebagaimana yang telah ditetapkan oleh Akta PBT. Apakah sumbangan pihak Kementerian bagi memastikan semua bandar raya dalam negara mencapai objektifnya.
47. PR-000-L41307  
**Datuk Md.Sirat bin Abu [ Bukit Katil ]** minta **MENTERI SUMBER MANUSIA** menyatakan adakah Kerajaan bercadang untuk mewujudkan sistem kuota dalam mana-mana bidang pekerjaan berdasarkan gender, memandangkan bandingan bilangan lelaki dan wanita berkelulusan pada masa ini semakin jauh jaraknya.
48. PR-000-L41481  
**Tuan Khalid bin Abdul Samad [ Shah Alam ]** minta **MENTERI KERJA RAYA** menyatakan apakah status projek pembinaan Hospital Shah Alam.
49. PR-000-L42485  
**Dato' Henry Sum Agong [ Lawas ]** minta **MENTERI PENERANGAN, KOMUNIKASI DAN KEBUDAYAAN** menyatakan usaha-usaha Kementerian bagi memberi kemudahan rangkaian jalur lebar di kawasan luar bandar Sarawak.

50. PR-000-L41423

**Tuan Fong Kui Lun [ Bukit Bintang ]** minta **PERDANA MENTERI** menyatakan bagaimanakah pengangkutan awam boleh mendapat manfaat dari penubuhan Suruhanjaya Pengangkutan Awam Darat memandangkan timbulnya berbagai masalah pengangkutan awam yang semakin merosot sejak akhir-akhir ini.

51. PR-000-L42291

**Dato' Sri Ong Tee Keat [ Pandan ]** minta **PERDANA MENTERI** menyatakan justifikasi yang mewajarkan pelaksanaan projek pembinaan loji jana kuasa nuklear di Malaysia. Berikan bandingan kos pembiayaan antara loji yang bersumber tenaga nuklear dengan loji yang bersumber tenaga lain. Tidakkah tenaga suria merupakan sumber tenaga yang lebih berdaya-maju dan lumayan bagi menjanaan kuasa kita.

52. PR-000-L41556

**Tuan John A/L Fernandez [ Seremban ]** minta **PERDANA MENTERI** menyatakan berkenaan dengan lawatan isteri kepada YAB. Perdana Menteri ke Oman dari 16 hingga 19 Januari 2011:-

- (a) berapakah kos yang ditanggung oleh Kerajaan bagi membayai lawatan itu; dan
- (b) apakah objektif yang cuba dan berjaya dicapai daripada lawatan tersebut.

53. PR-000-L43045

**Datuk Hajah Norah binti Abd Rahman [ Tanjung Manis ]** minta **MENTERI KESIHATAN** menyatakan sama ada Kementerian dapat mempertimbangkan sebuah klinik yang dilengkapi dengan perkakas dan ubat-ubatan dan menyediakan doktor dan jururawat memandangkan terdapat 12,000 orang penduduk menetap di Pulau Br uit.

54. PR-000-L43023

**Tan Sri Dato' Abd. Khalid bin Ibrahim [ Bandar Tun Razak ]** minta **MENTERI LUAR NEGERI** menyatakan :-

- (a) berapakah jumlah rakyat Malaysia yang telah memilih untuk hidup di luar negara (pecahan mengikut negara yang dipilih, kaum dan tahap pelajaran); dan
- (b) berapa ramaikah yang telah menyerahkan kerakyatan mereka dan apakah sebab utama mereka berbuat demikian.

55. PR-000-L42440

**Dato' Sri Azalina binti Dato' Othman Said [ Pengerang ]** minta **PERDANA MENTERI** menyatakan apakah terdapat sebarang cadangan dan kajian untuk mewujudkan jawatan pegawai-pegawai Kerajaan berdasarkan kawasan Parlimen dan bukannya berdasarkan daerah.

56. PR-000-L42536

**Tuan Mohd Yusmadi bin Mohd Yusoff [ Balik Pulau ]** minta **PERDANA MENTERI** menyatakan pendirian mengenai isu penggantungan Ahli Parlimen pembangkang dari persidangan Dewan tanpa mengambil kira undi-undi dari Ahli Parlimen pembangkang yang lain.

57. PR-000-L42446

**Puan Tan Ah Eng [ Gelang Patah ]** minta **MENTERI PERTAHANAN** menyatakan :-

- (a) langkah-langkah yang berkesan untuk menyelesaikan masalah projek pembinaan Kompleks 7 Briged Askar di kawasan Skudai yang dikenal pasti merupakan punca berlaku banjir; dan
- (b) langkah-langkah yang tegas terhadap pemaju yang tidak bertanggungjawab iaitu Kausar Corporation Sdn. Bhd. (KCSB) yang peratusan pembinaan projek masih pada tahap 18.3 peratus.

58. PR-000-L41838

**Tuan Azan bin Ismail [ Indera Mahkota ]** minta **MENTERI KEWANGAN** menyatakan kaedah perlaksanaan pelaburan EPF untuk portfolio antarabangsa sebagaimana yang telah dinaikkan kepada 20 peratus dan bagaimanakah kesannya setakat dan jangkaannya.

59. PR-000-L42934

**Dato' Seri Tiong King Sing [ Bintulu ]** minta **MENTERI PERUMAHAN DAN KERAJAAN TEMPATAN** menyatakan :-

- (a) adakah pihak Kementerian berhasrat untuk menjalankan kerja-kerja menaik taraf Balai Bomba Bintulu dari segi penyediaan kelengkapan, penggunaan jentera moden dan lain-lain memandangkan Bintulu sedang pesat membangun dengan terdapatnya bangunan tinggi; dan
- (b) bilakah kali terakhir pihak Kementerian membekal atau menjalankan kerja-kerja naik taraf ini.

60. PR-000-L42626

**Dato' Johari bin Abdul [ Sungai Petani ]** minta **MENTERI DALAM NEGERI** menyatakan :-

- (a) berapakah tahanan/Orang Kena Tuduh (OKT) yang mati semasa berada di lokap dan semasa di bawah jagaan polis sejak 2000 hingga Disember 2010; dan
- (b) apakah sebab-sebab utama kematian mereka.

61. PR-000-L41471  
**Tuan Salahuddin Bin Haji Ayub [ Kubang Kerian ]** minta **MENTERI DALAM NEGERI** menyatakan apakah tindakan pihak Kementerian terhadap isu tempoh latihan anggota PDRM yang semakin singkat (3 bulan). Adakah pihak Kementerian bersetuju bahawa tempoh ini memang tidak mencukupi bagi melahirkan anggota PDRM yang lebih cekap dan efisien.
62. PR-000-L41223  
**Tuan Mohd. Abdul Wahid bin Endut [ Kuala Terengganu ]** minta **MENTERI PENGAJIAN TINGGI** menyatakan jenis dan bentuk bantuan kepada pelajar-pelajar Malaysia yang terpaksa dibawa pulang dari Mesir dan menangguhkan pengajian mereka sehingga satu tahun.
63. PR-000-L42064  
**Tuan Khairy Jamaluddin [ Rembau ]** minta **MENTERI PERTAHANAN** menyatakan sama ada Kerajaan berhasrat untuk mengkaji corak, sistem dan struktur latihan anggota rejimen gerak khas dan komando negara secara saintifik dan tersusun terutama sekali bagi meningkatkan lagi ketahanan fizikal dan kecekapan yang berterusan.
64. PR-000-L41811  
**Tuan Manogaran a/l Marimuthu [ Telok Intan ]** minta **MENTERI KEWANGAN** menyatakan apabila seorang pembeli / pemilik rumah tidak dapat membayar bayaran ansuran kepada bank maka bank mengambil tindakan undang-undang untuk perintah jualan rumah itu. Bolehkah Kerajaan mengusul satu undang-undang baru untuk melarang bank untuk menjual rumah melalui lelongan jika rumah itu adalah rumah kediaman (*dwelling house*) yang mana pembeli / pemilik mempunyai hanya satu rumah yang didiami dengan keluarganya.
65. PR-000-L42225  
**Datuk Nur Jazlan Bin Mohamed [ Pulai ]** minta **MENTERI BELIA DAN SUKAN** menyatakan langkah-langkah yang diambil untuk menggalakkan sukan renang di Malaysia.
66. PR-000-L42051  
**Tuan Saifuddin Nasution bin Ismail [ Machang ]** minta **PERDANA MENTERI** menyatakan apakah Kerajaan mempunyai garis panduan mengenai sejumlah wang yang boleh disimpan oleh pegawai yang bertugas dengan pemimpin politik dalam Kerajaan.
67. PR-000-L41604  
**Datuk Wira Ahmad bin Haji Hamzah [ Jasin ]** minta **MENTERI DALAM NEGERI** menyatakan pendekatan melalui Program Transformasi Kerajaan (GTP) yang diguna pakai dalam usaha mempercepatkan proses permohonan warganegara tanpa mengabaikan aspek keselamatan dan tanpa melonggarkan syarat-syarat seperti mana yang terkandung dalam Perlembagaan Negara/undang-undang sedia ada.

## **ATURAN URUSAN MESYUARAT DAN USUL-USUL**

1. **Menyambung semula pertimbangan Rang Undang-undang Perbekalan Tambahan (2010) 2011 (D.R.6/2011) dan Usul Anggaran Perbelanjaan Pembangunan Tambahan Kedua 2010 seperti berikut :**

“Bahawa Dewan ini mengikut subseksyen 4(3) Akta Kumpulan Wang Pembangunan 1966, membuat ketetapan bahawa jumlah wang tambahan sebanyak satu bilion sembilan ratus empat puluh enam juta lima ratus sembilan puluh lapan ribu enam ratus lapan ringgit (RM1,946,598,608) diperuntukkan daripada Kumpulan Wang dan Butiran-butiran (Projek-projek) seperti yang dinyatakan dalam ruang pertama dan kedua penyata Anggaran Perbelanjaan Pembangunan Tambahan Kedua, 2010 yang dibentangkan sebagai Kertas Perintah 2 Tahun 2011 dan yang disenaraikan di sebelah Maksud-maksud dan Butiran-butiran (Projek-projek) dalam ruang kesebelas dan kedua belas penyata tersebut.”

### **Dalam Jawatankuasa Sebuah-buah Majlis (30 Mac, 2011)**

		Bacaan Kali Yang Kedua
2. (D.R. 47/2010)	Rang Undang-undang Tenaga Boleh Baharu 2010	“
	[ Kementerian Tenaga, Teknologi Hijau dan Air ]	
3. (D.R. 43/2010)	Rang Undang-undang Pihak Berkuasa Pembangunan Tenaga Lestari 2010	“
	[ Kementerian Tenaga, Teknologi Hijau dan Air ]	
4. (D.R. 34/2010)	Rang Undang-undang Juruanalisis Makanan 2010	“
	[ Kementerian Kesihatan ]	
5. (D.R. 38/2010)	Rang Undang-undang Perkapalan Saudagar (Pindaan dan Peluasan) 2010	“
	[ Kementerian Pengangkutan ]	
6. (D.R. 39/2010)	Rang Undang-undang Perkapalan Saudagar (Pencemaran Minyak) (Pindaan) 2010	“
	[ Kementerian Pengangkutan ]	
7. (D.R. 42/2010)	Rang Undang-undang Timbang Tara (Pindaan) 2010	“
	[ Perdana Menteri ]	

8. (D.R. 44/2010) Rang Undang-undang Perkhidmatan Kuarantin dan Pemeriksaan Malaysia 2010 “  
**[ Kementerian Pertanian dan Industri Asas Tani ]**
9. (D.R. 4/2011) Rang Undang-undang (Larangan) Kumpulan Wang Kutu (Pindaan) 2011 “  
**[ Kementerian Perdagangan Dalam Negeri, Koperasi dan Kepenggunaan ]**
10. (D.R. 30/2010) Rang Undang-undang Penilai, Pentaksir Dan Ejen Harta Tanah (Pindaan) 2010 “  
**[ Kementerian Kewangan ]**
11. (D.R. 48/2010) Rang Undang-undang Maktab Kerjasama (Perbadanan) (Pindaan) 2010 “  
**[ Kementerian Perdagangan Dalam Negeri, Koperasi dan Kepenggunaan ]**
12. (D.R. 2/2011) Rang Undang-undang Penggalakan Pelaburan (Pindaan) 2011 “  
**[ Kementerian Perdagangan Antarabangsa dan Industri ]**
13. (D.R. 1/2011) Rang Undang-undang Veteran 2011 “  
**[ Kementerian Pertahanan ]**
14. (D.R. 3/2011) Rang Undang-undang Institut Sukan Negara 2011 “  
**[ Kementerian Belia dan Sukan ]**
15. (D.R. 5/2011) Rang Undang-undang Saraan Hakim (Pindaan) 2011 “  
**[ Perdana Menteri ]**
16. (D.R. 46/2010) Rang Undang-undang Hak Cipta (Pindaan) 2010 “  
**[ Kementerian Perdagangan Dalam Negeri, Koperasi dan Kepenggunaan ]**

17. (D.R. 45/2010) Rang Undang-undang Perbadanan Pembangunan Kampong Bharu 2010 " "

**[ Kementerian Wilayah Persekutuan dan Kesejahteraan Bandar ]**

18. (D.R. 37/2009) Rang Undang-undang Cukai Barang dan Perkhidmatan 2009 " "

**[ Kementerian Kewangan ]**

19. PR-000-U41523

**Menteri Kewangan** akan mencadangkan:-

"Bahawa Dewan ini mengikut peruntukan subperenggan 8(3)(a)(iv) Akta Tatacara Kewangan 1957 [Akta 61], mengambil ketetapan bersetuju supaya Kerajaan melalui Menteri Kewangan (Pemerbadanan) membuat pelaburan dengan memperoleh sejumlah 10,000,000 unit saham biasa Danalntra Nasional Berhad, sebuah syarikat yang dimiliki sepenuhnya oleh Menteri Kewangan (Pemerbadanan) pada nilai RM1 bagi satu unit saham."

20. PR-000-U41523

**Menteri Kewangan** akan mencadangkan:-

"Bahawa Dewan ini mengikut peruntukan perenggan 4(b) Akta Pendanaan Kerajaan 1983 [Akta 275], mengambil ketetapan supaya Kerajaan memindahkan sebanyak RM15,500 juta wang terimaan Terbitan Pelaburan Kerajaan (TPK) yang diterima di bawah seksyen 3(1) Akta yang sama ke Kumpulan Wang Pembangunan yang dinyatakan dalam Jadual Kedua Akta Tatacara Kewangan 1957 [Akta 61] bagi maksud Kumpulan Wang tersebut."

21. PR-000-U41312

**Datuk Dr. Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa sejak akhir-akhir ini, negara kita sering dilanda bencana banjir kilat yang bukan sahaja mendatangkan kerugian kepada rakyat dan negara, malah terdapat juga kehilangan nyawa. Dan mengambil maklum bahawa sebahagian besar punca berlakunya bencana banjir kilat ini disebabkan oleh aktiviti manusia sendiri, di mana sungai-sungai, saliran-saliran dan kolam-kolam takungan air telah menjadi cetek disebabkan oleh mendapan lumpur dan pasir.

Dan mengambil maklum juga bahawa mendapan lumpur dan pasir-pasir di tempat-tempat yang disebutkan tadi adalah disebabkan oleh aktiviti manusia sendiri, misalnya penimbusan tanah secara terbuka, pembangunan tidak terancang, pembukaan ladang-ladang dan lain-lain lagi aktiviti pembangunan. Dan mengambil maklum bahawa dalam banyak kes, laporan kesan alam sekitar (EIA) tidak disediakan langsung atau tidak dipatuhi. Maka dengan ini Dewan hendaklah mengambil ketetapan untuk meminta Kerajaan melalui Kementerian yang berkaitan untuk meminda mana-mana akta yang perlu bagi menguatkuasakan peraturan sedia ada atau peraturan baru bagi mengatasi masalah yang mendarangkan kerugian besar kepada negara dan rakyat ini."

**(Menteri Sumber Asli dan Alam Sekitar)**

22. PR-000-U41326

**Datuk Dr. Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa terdapat banyak tanah-tanah perkuburan yang tidak terurus atau dikendalikan dengan baik, di mana ianya tidak disusun dengan rapi yang menyebabkan banyak kawasan kubur yang tidak dapat digunakan. Dan mengambil maklum bahawa kos penyelenggaraan dan pemuliharaan tanah perkuburan kian meningkat, banyak tanah perkuburan yang terbiar dan menjadi seperti kawasan belukar. Dan mengambil maklum juga bahawa kebanyakannya tanah perkuburan tidak dijaga ataupun diselia dengan baik kecuali sesetengah tanah perkuburan yang ditadbir oleh badan JKKK atau JK tanah perkuburan di kampung yang berkaitan. Dan mengambil maklum juga bahawa pada ketika ini belum ada mana-mana peraturan sedia ada yang memastikan satu-satu tanah perkuburan diselenggara atau dijaga dengan baik bagi memastikan ianya sentiasa bersih dan terpelihara. Maka dengan ini Dewan hendaklah mengambil ketetapan untuk meminta Kerajaan untuk menubuhkan satu lembaga atau yayasan yang akan bertanggungjawab untuk menyelenggara dan menyelia tanah-tanah perkuburan di seluruh negara agar ianya sentiasa terpelihara sama ada dari segi kesihatan, kebersihan maupun keindahan."

**(Menteri Sumber Asli dan Alam Sekitar)**

23. PR-000-U41335

**Datuk Dr. Marcus Mojigoh [ Putatan ]** akan mencadangkan:-

" Bahawa Dewan ini mengambil maklum bahawa masalah tanah terbiar kian berleluasa. Dan mengambil maklum bahawa masalah bukan sahaja tidak mendarangkan sebarang hasil kepada pemilik tanah tersebut, malah ianya akan mendarangkan masalah lain seperti tempat pembiakan nyamuk aedes, ular, tikus dan sebagainya yang boleh mendarangkan berbagai jenis penyakit.

Dan mengambil maklum juga bahawa perkara ini berlaku kerana beberapa sebab misalnya si pemilik tidak mampu untuk mengusahakan tanah tersebut , tanah tersebut terlalu kecil keluasannya, keluasan tanah yang tidak mencukupi bagi syarikat besar seperti FELCRA untuk mengusahakannya dan lain-lain sebab lagi. Maka dengan ini Dewan hendaklah mengambil ketetapan untuk meminta Kerajaan untuk menggubal satu akta atau peraturan di mana ianya akan dapat mendorong atau memastikan bahawa pemilik tanah-tanah terbiar tersebut untuk mengusahakannya. Di samping itu, menubuhkan satu koperasi bagi memajukan tanah-tanah tersebut dengan dana disumbangkan oleh syarikat swasta (di bawah Program CSR) dan Kerajaan."

**(Menteri Sumber Asli dan Alam Sekitar)**

24. PR-000-U41341

**Datuk Dr. Marcus Mojigoh [ Putatan ]** akan mencadangkan:-

" Bahawa Dewan ini mengambil maklum bahawa masalah kebanyakan benteng sungai-sungai di pekan-pekan utama dibina dengan konkrit. Dan mengambil maklum bahawa sungai-sungai konkrit ini bukan sahaja tidak mesra alam, tumbuhan yang lazimnya tumbuh di tebing-tebing sungai juga tidak dapat tumbuh. Dan mengambil maklum juga bahawa sungai-sungai konkrit ini juga tidak memberikan ruang bagi ikan-ikan di sungai untuk meletakkan telur mereka dan membiak, seperti mana lazimnya berlaku di sungai-sungai semulajadi. Maka dengan ini Dewan hendaklah mengambil ketetapan untuk meminta Kerajaan untuk menambah mana-mana peraturan sedia ada, supaya benteng-benteng sungai dibina dengan menggunakan cerucuk kayu keras ataupun "*interlocking bricks*" bagi membolehkan rerumput tumbuh dan juga ikan-ikan bertelur dan membiak (sebagaimana yang dibina di bandar Sibu, Sarawak). Kaedah ini adalah lebih mesra alam di samping mengekalkan flora dan fauna serta kehidupan marin sungai tersebut."

**(Menteri Sumber Asli dan Alam Sekitar)**

25. PR-000-U41523

**Dr. Tan Seng Giaw [ Kepong ]** akan mencadangkan:-

"Bahawa Dewan ini membahaskan faktor-faktor seperti inflasi, dasar yang tidak adil, keadaan hak asasi, kedudukan kekurangan kebebasan media yang menjaskan kehidupan rakyat. Bahawa Dewan ini juga membincangkan apakah perbezaan di antara Malaysia berbanding dengan negara Mesir yang mengalami pemberontakan 'bunga melati' moden."

**(Perdana Menteri)**

26. PR-000-U41525

**Dr. Tan Seng Giaw [ Kepong ]** akan mencadangkan:-

"Bahawa Dewan ini mendebatkan keperluan untuk mengkaji secara menyeluruh kekurangan kualiti sesetengah doktor di negara ini serta cara-cara untuk mengatasinya. Dewan ini juga membicarakan sebab-musabab Majlis Perubatan Malaysia tidak dapat mengawal dengan berkesan standard graduan perubatan lebih 3,500 orang setiap tahun."

**(Menteri Kesihatan)**

27. PR-000-U43074

**Puan Teresa Kok Suh Sim [ Seputeh ]** akan mencadangkan:-

"Bahawa Dewan ini mengambil keputusan untuk membenarkan siaran langsung sidang Dewan Rakyat melalui televisyen supaya rakyat boleh menonton ucapan para ahli berhormat dan proses Dewan Rakyat membuat keputusan terhadap dasar dan undang-undang."

**(Menteri Penerangan, Komunikasi dan Kebudayaan)**

28. PR-000-U43075

**Puan Teresa Kok Suh Sim [ Seputeh ]** akan mencadangkan:-

"Bahawa Dewan ini mengambil keputusan untuk memulihkan Pilihanraya Kerajaan Tempatan demi menjadikan perkhidmatan Kerajaan tempatan di negara kita lebih berkesan di samping memulangkan hak kepada rakyat untuk memilih Datuk Bandar dan ahli Majlis Kerajaan Tempatan."

**(Menteri Perumahan dan Kerajaan Tempatan)**

29. PR-000-U43076

**Puan Teresa Kok Suh Sim [ Seputeh ]** akan mencadangkan:-

"Bahawa Dewan ini mengambil keputusan untuk mendorong Kerajaan untuk melaksanakan kempen kitar semula dan kempen pengurangan penggunaan plastik dengan lebih gigih demi memelihara kebersihan alam sekitar."

**(Menteri Perumahan dan Kerajaan Tempatan)**

30. PR-000-U43077

**Puan Teresa Kok Suh Sim [ Seputeh ]** akan mencadangkan:-

"Bahawa Dewan ini mengambil keputusan untuk mengembalikan Akta Perkhidmatan Parliment yang telah dimansuhkan pada tahun 1993 sebagai langkah untuk menjadikan Parliment Malaysia sebagai Parliment Dunia Pertama."

**(Perdana Menteri)**

31. PR-000-U43078

**Puan Teresa Kok Suh Sim [ Seputeh ]** akan mencadangkan:-

"Bahawa Dewan ini menyokong cadangan Suruhanjaya DiRaja Pembaikan Perjalanan dan Pengurusan PDRM dan YAB Perdana Menteri untuk menubuhkan Suruhanjaya Bebas dan Salah Laku Polis (IPCMC)."

**(Menteri Dalam Negeri)**

32. PR-000-U41480

**Datuk Eric Enchin Majimbun [ Sepanggar ]** akan mencadangkan:-

"Bahawa Dewan Yang Mulia ini menetapkan dan membincangkan mengenai perjanjian di antara pihak Petronas dengan Kerajaan negeri Sabah dan Persekutuan berkaitan cari gali minyak yang bukan sahaja mengandungi minyak mentah tetapi juga terdapat bahan-bahan lain seperti gas agar pihak-pihak yang berkenaan dapat menentukan dasar dan cara untuk meneliti dan mengkaji semula hasil galian tersebut demi untuk kebaikan bersama".

**(Perdana Menteri)**

33. PR-000-U41484

**Datuk Eric Enchin Majimbun [ Sepanggar ]** akan mencadangkan:-

"Bahawa Dewan Yang Mulia ini menetapkan dan meluluskan supaya kakitangan Kerajaan yang ditugaskan oleh SPR semasa pilihan raya berlangsung dan mereka yang bertugas di luar kawasan pada ketika itu termasuklah anggota polis, tentera dan sebagainya yang membuang undi secara undi pos seharusnya mengundi dengan sebebas-bebasnya tanpa dipengaruhi atau diarah oleh mana-mana pihak. Para pengundi pos ini mesti dan haruslah membuang undi untuk calon dari kediaman asal atau alamat tetapnya dan bukan di kawasan di mana pengundi itu bertugas."

**(Perdana Menteri)**

34. PR-000-U41490

**Datuk Eric Enchin Majimbun [ Sepanggar ]** akan mencadangkan:-

"Bahawa Dewan Yang Mulia ini membincangkan dengan seriusnya mengenai kemuliaan rakyat negara kita sebagai Rakyat Malaysia dengan suku-suku kaum masing-masing dan bukan hanya dengan sebutan suku kaum Melayu, Cina, India dan lain-lain yang jelas mengetepikan suku-suku kaum dari Sabah dan Sarawak.

Keadaan tersebut merupakan satu penghinaan bagi kaum-kaum dari Sabah dan Sarawak yang dicatat sebagai 'lain-lain' dalam borang-borang pentadbiran Kerajaan yang perlu dicatat sejelas-jelasnya mengikut suku bangsa rakyat Malaysia yang telah wujud sekian lama di negara ini."

**(Menteri Dalam Negeri)**

35. PR-000-U41436

**Tuan Fong Kui Lun [ Bukit Bintang ]** akan mencadangkan:-

"Bahawa Pilihanraya Kerajaan Tempatan hendaklah dipulihkan semula bagi melengkapi sistem demokrasi di Malaysia dan mengembalikan hak rakyat untuk memilih perwakilan mereka sendiri dalam Kerajaan Tempatan".

**(Menteri Perumahan dan Kerajaan Tempatan)**

36. PR-000-U41440

**Tuan Fong Kui Lun [ Bukit Bintang ]** akan mencadangkan:-

"Bahawa Dewan ini membuat ketetapan supaya Kerajaan menyalurkan peruntukan tahunan kepada Ahli-Ahli Parlimen Pakatan Rakyat yang mewakili kawasan-kawasan yang dimenangi sebagaimana yang diberikan kepada wakil-wakil rakyat BN, supaya peruntukan dapat disalurkan untuk manfaat pengundi dan kawasan yang diwakili, sepertimana yang diamalkan di negara Taiwan. Langkah menyekat peruntukan tahunan wakil rakyat PR sebenarnya adalah satu diskriminasi politik ke atas para pengundi dan rakyat keseluruhannya dan sekatan amalan demokrasi sendiri".

**(Perdana Menteri)**

37. PR-000-U41442

**Tuan Fong Kui Lun [ Bukit Bintang ]** akan mencadangkan:-

"Bahawa Dewan ini membuat ketetapan supaya Kementerian Pelajaran menyemak dan menyusun semula sukanan pelajaran subjek Sejarah Malaysia bagi memasukkan input yang tertinggal supaya ia lebih komprehensif, terbuka dan menjadi menarik untuk dipelajari".

**(Menteri Pelajaran)**

38. PR-000-U42596

**Tuan Kulasegaran A/L Murugeson [ Ipoh Barat ]** akan mencadangkan:-

"Bahawa Dewan ini harus meminta Kerajaan supaya menubuhkan satu badan bebas bagi menjalankan kajian terperinci untuk mengenalpasti keperluan untuk membina sekolah-sekolah Cina dan Tamil yang baru."

**(Menteri Pelajaran)**

39. PR-000-U42599

**Tuan Kulasegaran A/L Murugeson [ Ipoh Barat ]** akan mencadangkan:-

"Bahawa Dewan ini harus mengambil maklum bahawa Kerajaan harus menguatkuasakan undang-undang bagi mensyaratkan semua wakil rakyat mengumumkan aset milikan/kekayaan peribadi secara terbuka".

**(Perdana Menteri)**

40. PR-000-U42601

**Tuan Kulasegaran A/L Murugeson [ Ipoh Barat ]** akan mencadangkan:-

"Bahawa Dewan ini harus meminta Kerajaan supaya mengambil ketetapan yang rasional dalam pemilihan jumlah golongan bukan melayu secara seimbang dalam sektor perkhidmatan awam."

**(Perdana Menteri)**

41. PR-000-U42289

**Tuan Chua Tian Chang [ Batu ]** akan mencadangkan:-

" Bahawa Dewan ini mendesak Kerajaan Persekutuan mengembalikan hak kepada Negeri untuk melantik Pegawai Eksekutif *Ex-officio* yang memberi kuasa kepada Menteri Besar yang dipilih rakyat dan menghormati kedaulatan negeri. Jelasnya, pemindahan Perlembagaan pada Tahun 1983 terbukti adalah memusatkan kuasa kepada Perdana Menteri dan Ketua Setiausaha Negara untuk campur tangan dalam pentadbiran negeri."

**(Perdana Menteri)**

42. PR-000-U41589

**Tuan John A/L Fernandez [ Seremban ]** akan mencadangkan:-

"Bahawa Dewan ini dapat membincangkan agar Suruhanjaya Pilihan Raya mencadangkan kepada Kerajaan agar:-a) mengurangkan umur minimum kelayakan mengundi dari 21 tahun kepada 18 tahun;b) menjadikan pendaftaran untuk mengundi adalah satu perkara yang automatik; dan c) pengundi berdaftar adalah diwajibkan keluar mengundi."

**(Perdana Menteri)**

43. PR-000-U41590

**Tuan John A/L Fernandez [ Seremban ]** akan mencadangkan:-

"Bahawa Dewan ini dapat membahaskan agar satu mekanisma yang efektif dalam bentuk jangka masa pendek dalam menangani masalah banjir di negara ini."

**(Menteri Sumber Asli dan Alam Sekitar)**

44. PR-000-U41591

**Tuan John A/L Fernandez [ Seremban ]** akan mencadangkan:-

"Bahawa Dewan ini mendesak agar Kerajaan dapat mengawal harga barang asas seperti susu, gula dan tepung yang kerap naik harga tanpa mengambil kira kesannya terhadap rakyat yang rata-ratanya berpendapatan sederhana dan rendah."

**(Menteri Perdagangan Dalam Negeri, Koperasi dan Kepenggunaan)**

45. PR-000-U41592

**Tuan John A/L Fernandez [ Seremban ]** akan mencadangkan:-

"Bahawa Dewan ini dapat mengambil perhatian secara serius di mana terdapat ramai golongan muda kini telah diisyiharkan muflis akibat dari penggunaan kad kredit yang tidak terkawal."

**(Menteri Kewangan)**

46. PR-000-U41594

**Tuan John A/L Fernandez [ Seremban ]** akan mencadangkan:-

"Bahawa Dewan ini dapat mengarahkan Kerajaan untuk meminta semua penerima konsesi tol agar mengkaji semula kadar tol di negara ini bagi mengurangkan beban rakyat."

**(Menteri Kerja Raya)**

47. PR-000-U41597

**Tuan John A/L Fernandez [ Seremban ]** akan mencadangkan:-

"Bahawa Dewan ini mengambil keputusan untuk mengadakan satu mata pelajaran tambahan di sekolah yang mengajar agama, dat istiadat, budaya serta cara hidup semua kaum di negara ini yang terdiri dari pebagai kaum bagi mengelakkan perkara yang berlaku baru-baru ini di mana seorang pelatih beragama Sikh dipotong rambut panjangnya di Kem Pusat Khidmat Negara tidak berulang. Isu ini adalah pelanggaran hak asasi manusia dan hak beragama di Malaysia. Suruhan Siasatan Diraja harus ditubuhkan untuk menyiasat pekara ini. Jikalau orang ramai mengenali agama, adat istiadat, budaya serta cara hidup kaum lain, pekara seumpama ini tidak akan berlaku dan isu perkauman juga dapat dihindari."

**(Menterian Pelajaran)**

48. PR-000-U41600

**Tuan John A/L Fernandez [ Seremban ]** akan mencadangkan:-

"Bahawa Dewan ini meminta Kerajaan Malaysia memberi lebih banyak peluang kepada masyarakat miskin tanpa mengira agama dan bangsa serta orang yang kurang upaya menjawat jawatan di sektor awam."

**(Perdana Menteri)**

49. PR-000-U41606

**Tuan John A/L Fernandez [ Seremban ]** akan mencadangkan:-

"Bahawa Dewan ini meminta Kerajaan untuk menyediakan perkhidmatan *Wifi* di seluruh negara untuk menggalakkan rakyat menggunakan internet bagi menambah pengetahuan mereka dan ini dapat menggalakkan semua lapisan masyarakat menggunakan internet."

**(Menteri Penerangan, Komunikasi dan Kebudayaan)**

50. PR-000-U41609

**Tuan John A/L Fernandez [ Seremban ]** akan mencadangkan:-

"Bahawa Dewan ini meminta Kerajaan mendesak pengusaha-pengusaha stesen minyak untuk menyedia lebih banyak perkhidmatan membekalkan gas bagi menggalakkan lebih ramai orang menggunakan gas bagi kenderaan mereka yang mana ini dapat mengurangkan pencemaran udara."

**(Menteri Perdagangan Dalam Negeri, Koperasi dan Kepenggunaan)**

51. PR-000-U41611

**Tuan John A/L Fernandez [ Seremban ]** akan mencadangkan:-

"Bahawa Dewan ini meminta Kerajaan menggubal undang-undang agar anak-anak dihadapkan ke mahkamah sekiranya mereka mengabaikan ibu bapa mereka yang sudah tua."

**(Menteri Pembangunan Wanita, Keluarga dan Masyarakat)**

52. PR-000-U42038

**Tuan Liew Chin Tong [ Bukit Bendera ]** akan mencadangkan:-

"Bahawa Dewan ini menyokong cadangan menetapkan sebarang pembelian aset atau sistem pertahanan yang melebihi 100 juta oleh Kementerian Pertahanan, mesti dibawa ke Parlimen dibahas dan diaudit oleh Jabatan Audit Negara sebagai syarat meneruskan pembelian ini. Ini juga bertujuan untuk mempertingkatkan integriti dan keberkesanan pembelian sistem pertahanan. Ini adalah diakibatkan oleh pembelian Jet Sukhoi dan Kapal Selam Scorpene yang telah menimbulkan banyak persepsi negatif terhadap negara".

**(Menteri Pertahanan)**

53. PR-000-U42040

**Tuan Liew Chin Tong [ Bukit Bendera ]** akan mencadangkan:-

"Bahawa Dewan ini menyokong bahawa Perdana Menteri untuk menjelaskan kekeliruan yang disebabkan atas jawapan beliau tentang perbelanjaan Isteri Perdana Menteri pada Dewan yang lepas iaitu pada November 2010 yang tidak dipadani dengan kewujudan "First Lady of Malaysia Division" seperti yang ditunjukkan oleh direktori laman web Jabatan Perdana Menteri."

**(Perdana Menteri)**

54. PR-000-U42020

**Dato' Seri Zahrain Mohamed Hashim [ Bayan Baru ]** akan mencadangkan:-

"Bahawa Dewan ini membuat ketetapan untuk merakamkan setinggi-tinggi penghargaan dan terima kasih kepada Kerajaan Malaysia, Kerajaan Arab Saudi, Majlis Keselamatan Negara, Angkatan Tentera Malaysia dan pihak lain yang terlibat secara langsung dan tidak langsung dalam menjayakan "Ops Piramid" untuk menyelamatkan rakyat Malaysia yang terperangkap dalam pergolakan berdarah di bumi Mesir".

**(Menteri Luar Negeri)**

55. PR-000-U42023

**Dato' Seri Zahrain Mohamed Hashim [ Bayan Baru ]** akan mencadangkan:-

"Bahawa Dewan ini membuat ketetapan mencadangkan kepada YAB Perdana Menteri supaya keanggotaan Panel Perunding dan Pencegah Rasuah Suruhanjaya Pencegah Rasuah Malaysia (SPRM) dikaji semula bagi mengelakkan sebarang tindakan anggota panel yang mencatatkan imej SPRM dan Kerajaan."

**(Perdana Menteri)**

56. PR-000-U42025

**Dato' Seri Zahrain Mohamed Hashim [ Bayan Baru ]** akan mencadangkan:-

"Bahawa Dewan ini membuat ketetapan mendesak YAB Perdana Menteri mengkaji semula pengurusan dana dan bentuk pelaburan Lembaga Tabung Haji Malaysia. Dewan ini sedar tentang wujudnya kerisauan di kalangan umat Islam tentang penglibatan Lembaga Tabung Haji dalam pelaburan berisiko tinggi di dalam dan luar negara".

**(Perdana Menteri)**

57. PR-000-U42028

**Dato' Seri Zahrain Mohamed Hashim [ Bayan Baru ]** akan mencadangkan:-

"Bahawa Dewan ini membuat ketetapan mendesak YB Menteri Dalam Negeri dan YB Menteri Pembangunan Wanita, Keluarga dan Masyarakat mengambil langkah-langkah perlu untuk membersihkan bandaraya-bandaraya kita daripada sindiket "pengemis dan peminta derma" yang memperalatkan kanak-kanak, orang tua, orang kurang upaya dan pendatang asing. Dewan sedar bahawa tindakan 'pengemis dan peminta derma' ini menjelaskan imej negara dan menimbulkan persepsi negatif terhadap Kerajaan dan rakyat, selain masalah keselamatan."

**(Menteri Pembangunan Wanita, Keluarga dan Masyarakat)**

58. PR-000-U42030

**Dato' Seri Zahrain Mohamed Hashim [ Bayan Baru ]** akan mencadangkan:-

"Bahawa Dewan ini membuat ketetapan mendesak YB Menteri Kewangan memansuhkan pendekatan penghapusan subsidi secara total dalam kerangka Model Baru Ekonomi (NEM).

Dewan mengambil iktibar bahawa tindakan drastik penghapusan subsidi akan menggugat kestabilan sosial dan mungkin mengancam keselamatan negara seperti yang pernah berlaku di beberapa negara jiran, termasuk Indonesia pada lewat tahun 90an dan situasi terkini di negara Mesir."

**(Menteri Kewangan)**

59. PR-000-U42273

**Tuan Gwo-Burne Loh [ Kelana Jaya ]** akan mencadangkan:-

"Bahawa Dewan ini mengambil maklum bahawa Kerajaan Malaysia sebagai anggota Majlis Hak Asasi Manusia Bangsa-bangsa Bersatu dalam menguatkuasa Resolusi 62/149 Bangsa-Bangsa Bersatu mengenai Moratorium terhadap Hukuman Mati yang telah dikuatkuaskan oleh Perhimpunan Agong Bangsa-Bangsa Bersatu pada 18 Disember 2007 di mana negara-negara yang masih mengamal hukuman mati diminta untuk menghentikan penggunaan hukuman mati dan mengurangkan jumlah hukuman-hukuman yang membawa hukuman mati secara berperingkat dan melaksanakan moratorium terhadap kesemua hukuman mati dengan hasrat untuk menghapuskan hukuman ini sama sekali. Maka dengan ini Dewan hendaklah mengambil ketetapan untuk meminta Kerajaan melalui Kementerian Luar Negeri untuk membantu mematuhi Moratorium tersebut dan meminda undang-undang yang bercanggah dengan Moratorium tersebut."

**(Menteri Dalam Negeri)**

60. PR-000-U42275

**Tuan Gwo-Burne Loh [ Kelana Jaya ]** akan mencadangkan:-

"Bahawa Dewan ini membuat ketatapan menubuhkan sebuah Suruhanjaya Diraja Siasatan Kes Kematian Tujuh Warga Pekerja Asing pada hujung Mei 2009 akibat kerja perobohan Jaya Supermarket, Petaling Jaya. Daripada siasatan yang dijalankan kerja perobohan tersebut tidak mendapat kelulusan Jabatan Keselamatan dan Kesihatan Pekerjaan (DOSH)."

**(Menteri Sumber Manusia)**

61. PR-000-U42278

**Tuan Gwo-Burne Loh [ Kelana Jaya ]** akan mencadangkan:-

"Bahawa Dewan ini mendesak Suruhanjaya Integriti Agensi Pengawalaan (SIAP) menjalankan siasatan ke atas kematian adik Aminulrasyid yang ditembak mati oleh anggota polis. Dewan juga mendesak mengenai perlantikan panel khas di dalam siasatan kes ini.

Polis didakwa menyalahgunakan senjata api sehingga menyebabkan Aminulrasyid terbunuh oleh polis. Daripada siasatan dan perbicaraan yang dijalankan, banyak pihak tidak berpuas hati dengan perjalannya dan diharap agar Suruhanjaya ini mampu untuk menjawab pelbagai spekulasi."

**(Perdana Menteri)**

62. PR-000-U42196

**Dato' Haji Mahfuz bin Omar [ Pokok Sena ]** akan mencadangkan:-

"Bahawa Dewan ini membuat ketetapan supaya Kerajaan mengambil langkah segera bagi meringankan beban rakyat dengan menghapus dan memansuhkan semua jenis tol di lebuh raya Malaysia."

**(Perdana Menteri)**

63. PR-000-U42197

**Dato' Haji Mahfuz bin Omar [ Pokok Sena ]** akan mencadangkan:-

"Bahawa Dewan ini membuat ketetapan supaya Kerajaan mengambil tindakan membatalkan semua jenis saman ekor tertunggak yang berjumlah 15 juta saman setelah pelaksanaan format dan Akta Pengangkutan Jalan pindaan 2010 dikuat kuasakan."

**(Menteri Dalam Negeri)**

64. PR-000-U42199

**Dato' Haji Mahfuz bin Omar [ Pokok Sena ]** akan mencadangkan:-

"Bahawa Dewan ini membuat ketetapan supaya Kerajaan menutup syarikat Felda Plantation dan mengagihkan tanah milik Felda Plantation kepada generasi kedua dan ketiga peneroka Felda."

**(Perdana Menteri)**

65. PR-000-U42201

**Dato' Haji Mahfuz bin Omar [ Pokok Sena ]** akan mencadangkan:-

"Bahawa Dewan ini membuat ketetapan supaya Kerajaan memberikan pengiktirafan peranan dan jasa kakitangan awam dengan mengkaji semula struktur gaji bermula dengan menaikkan imbuhan perguruan sebanyak RM500 sebulan setiap seorang guru sebagai penghargaan kepada guru."

**(Perdana Menteri)**

66. PR-000-U42203

**Dato' Haji Mahfuz bin Omar [ Pokok Sena ]** akan mencadangkan:-

"Bahawa Dewan ini membuat ketetapan supaya Kerajaan menaikkan royalti minyak kepada negeri Sabah, Sarawak, Terengganu dan Kelantan kepada 20 peratus."

**(Perdana Menteri)**

**RISALAT-RISALAT YANG DIBAWA KE DALAM MESYUARAT**  
**(DEWAN RAKYAT)**

<b><u>TAHUN 2011</u></b>	<b><u>RISALAT/DOKUMEN</u></b>	<b><u>TARIKH DIBENTANGKAN</u></b>
ST.13	Laporan Tahunan dan Penyata Kewangan Perbadanan Aset Keretapi Bagi Tahun 2009.	31 Mac 2011

